

DEPORTE LOKAL

Uruguay kampion den 'FFB Cup 2024'

KRALENDIJK---E ekipo di Uruguay a logra triunfo pa goliada ayera riba Estrellas den futbòl na Boneiru.

Esaki den e gran final di e torneo FFB Cup 2024, ku tabata torneo pa ekiponan ku no a logra klasifiká pa playoff Kaya 6. Den e lucha pa e titulo ayera, Uruguay a logra triunfo ku skor di 6-2, despues ku na sosiegu nan tabatin bentaha di 2-1. Ku esaki, e ekipo di Uruguay próksimamente lo topa ku e ekipo kampion di FFB di otro siman, den e gran final di Super Cup den futbòl na Boneiru.

Chile vs Perú ta kaba sin gol

MERKA---Selekshonnan nashonal di Chile i Perú a lucha tenasmente ayera, den wega bálido pa Grupo A di Kopa Amérika su edishon 2024.

Sinembargo finalmente nan mester a konforma ku empate sin anotashon, den wega ku a hunga den Stadion AT&T, ku refri Wilton Sampaio for di Brazil, dirigiendo. Ku e resultado aki, tur ekipo den grupo A a hunga un wega, unda ku Argentina ta komandá ku 3 punto, Chile i Perú ta keda ku 1 punto i Canada ta keda den sotano sin punto.

Kopa Amérika 2024 ku weganan di grupo B i C

MERKA---Kopa Amérika su edishon pa aña 2024 ta sigui durante di e fin di siman aki, ku 4 wega. Esakinan repartí den 2 den grupo B awe i otro 2 mañan, den grupo C.

Esaki di e siguiente manera:

AWE ORA	GRUPO	EKIPONAN
18.00	B	Ecuador vs Venezuela
21.00	B	Mexico vs Jamaica
Mañan		
18.00	C	Merka vs Bolivia
21.00	C	Uruguay vs Panamá

Mama di Pele a fayesé

BRAZIL--- E señora mama di e futbolista brasileiro Pele, a fayesé ayera, na edat di 101 aña.

Esaki despues ku Pele mes a fayesé na desèmber di aña 2022, ku 82 aña di edat.



Pele i su señora mama.

Ocean View Elite na di 3 puesto den Curfutsal



WILLEMSTAD---Kancha di sala deportivo Errol Rooi na SDK, ayera tabata esenario pa wega pa di 3 i 4 puesto den e di 2 divishon di e kampionato di Curfutsal 2024.

Tabata enkuentro ku a bai entre e ekiponan di Ocean View Elite i UD Koraal Specht, unda ku Elite a resultá e ganadó, ku triunfo ku skor di 5-1. Jeffry Schei-

delaar (3x), Thareeq Adriana i Kenrick Jansen tabata esnan ku a anotá pa e ekipo ganadó, mientras ku Keniemar Locadia a salba honor anotando pa e ekipo di barío di Koraal Specht.

Bugs Bunny no a presentá...

Seguidamente pa ku e wega pa di 3 i 4 puesto den e promé divishon, ku mester a hunga den di 2 ora ayera

nochi, e ekipo di Bugs Bunny no a hasi akto di presensia pa asina enfrentá e ekipo di Sta Helena Stars, unda e último aki ta gana pa default i keda na di 3 puesto, lagando Bugs Bunny ku e di 4 puesto den nan ousensia.

Riba e kombinashon di fotonan, por mira algun akshon di e wega entre e ekipo di Ocean View Elite i UD Koraal Specht.

Remko ku kurso pa lidernan di 14 barío

WILLEMSTAD---Awe ta dia ku Remko Bicentini den representashon di Fundashon Bicentini, lo reuní ku i duna un kurso na lidernan di 14 diferente barío riba nos isla.

Esaki ku e meta pa próksimamente iniisiá ku e proyekto sosial deportivo mas grandi di e fundashon, "van STRAAT naar STADION", ku diferente meta. Esaki unda lo bai tin entre otro un torneo di futbòl den barionan di Kòrsou, ku partisipashon di ekiponan formá pa hóbennan di barío.

Despues ku tabatin inskripsion i Sharetzy Dometilia a kontinuá ku e trabounan di preparashon, awe ta fecha ku Remko lo organisá un kurso pa e diferente lider/coachnan, pa seguidamente esakinan tambe por sòru pa nan muchanan di barío ta debidamente prepará pa e weganan di e torneo.

E proyekto ta den 2 parti, unda ta stimulá nos muchanan pa hasi deporte i ta salú i di otro banda, ta muestra mayornan i hóbennan riba nan responsabilidadat pa ku nan barío i komunidad, ku sigur ta di gran



Remko ku hopi dedikashon speshalmente na nos muchanan.

nifikashon i por traha riba nan futuro.

Tambe famianan di ménos rekursu, tòg por tin nan yunan den deporte . Mas aleu, Remko ta trahando tambe pa sigui ku e proyekto aki, pa alumnonan na skolnan básiko i tambe den diferente organisashon deportivo hubenil.